

## **Қонун ҳужжатларининг рақобатга таъсирини баҳолаш бўйича ХУЛОСА №32**

### **I. Умумий маълумотлар**

Хулоса Адлия вазирлигида 2019 йил 19 апрелда 3155-сон билан рўйхатга олинган Қонун ҳужжатларининг рақобатга таъсирини баҳолаш методикаси асосида тайёрланди.

#### **1. Лойиҳани тақдим этувчи орган номи:**

Ўзбекистон Республикаси Ветеринария ва чорвачиликни ривожлантириш давлат қўмитаси

#### **2. Лойиҳанинг номи ва тури:**

Ўзбекистон Республикаси Вазирлар Маҳкамасининг “Чорвачилик тармоғига давлат томонидан субсидия ажратишни тартибга солувчи норматив-ҳуқуқий ҳужжатларни тасдиқлаш тўғрисида” 2020 йил 15 майдаги 280-сон қарорига ўзгартиришлар ва қўшимчалар киритиш тўғрисида”ги қарор лойиҳаси

#### **3. Лойиҳани ишлаб чиқиш учун асос:**

Ўзбекистон Республикаси Президентининг “Республикада қўлда тўқилган гиламчилик соҳасини ривожлантириш чора-тадбирлари тўғрисида” 2020 йил 26 июндаги ПҚ–4759-сон қарори 15-банди иккинчи хатбоши

#### **4. Лойиҳанинг қисқача мазмуни:**

“Чорвачилик маҳсулотлари етиштирувчи хўжаликларга улар томонидан қўлда гилам тўқишга ихтисослашган хунармандлар ва ташкилотларга сотилган “меринос” зотли қўй ва “ангор” зотли эчкиларнинг жуни учун субсидия ажратиш тартиби тўғрисидаги низом киритилмоқда

### **II. Тадбиркорлик субъектларининг асосий гуруҳлари бошқа масъул шахслар хамда таклиф этилаётган ҳужжатда давлат органларининг манфаатларига доир масалалар тартибга солинадиган маълумотлар**

#### **5. Ҳужжат билан манфаатлари назарда тутилаётган гуруҳ иштирокчиларининг таснифи:**

**тадбиркорлик субъектлари гуруҳлари** – чорвачилик маҳсулотлари етиштирувчи хўжаликлар, жун етиштириш билан шуғулланувчи хўжалик юритувчи субъектлар, гилам тўқиш билан шуғулланаётган хунармандлар ва ташкилотлар;

**давлат органлари гуруҳи** – Ўзбекистон Республикаси Ветеринария ва чорвачиликни ривожлантириш давлат қўмитаси, Ўзбекчорванасл” агентлиги, Қишлоқ хўжалиги вазирлиги, Молия вазирлиги, Қорақалпоғистон Республикаси

Вазирлар Кенгаши, вилоятлар ҳамда шаҳар ва туманлар ҳокимликлари, туман/шаҳарлар Агросаноат мажмуи устидан назорат қилиш инспекцияси, давлат солиқ инспекцияси, қишлоқ хўжалиги бўлими, статистика бўлими, Вазирлар Маҳкамаси;

**бошқа иштирокчилар гуруҳи муносабатлари** – Фермер, деҳқон хўжаликлари ва томорқа ер эгалари туман кенгаши.

**6. Янги ёки амалдаги функцияларга киритилаётган ўзгартиришлар, ваколатлар, мажбуриятлар, имтиёзлар, преференциялар, давлат органлари ҳуқуқлари ва уларни амалга ошириш тартиби тўғрисида, шунингдек, киритилаётган чекловлар бўйича ҳамда бошқа маълумотлар:**

**6.1.** Ўзбекистон Республикаси Вазирлар Маҳкамасининг “Чорвачилик тармоғига давлат томонидан субсидия ажратишни тартибга солувчи норматив-ҳуқуқий ҳужжатларни тасдиқлаш тўғрисида” 2020 йил 15 майдаги 280-сон қарорига ўзгартиришлар ва қўшимчалар киритиш тўғрисида”ги қарор лойиҳасининг иловасида мазкур қарорнинг амалдаги 1-банди саккизинчи хатбошиси қуйидаги таҳрирда баён этилмоқда:

**“Паррандасаноат” уюшмасига аъзо бўлган паррандачилик хўжаликлари томонидан 2020 йилда паррандаларнинг ота-она галасини шакллантириш учун импорт қилинадиган бир кунлик наслдор жўжалар бош сони прогноз кўрсаткичлари 8-иловага мувофиқ тасдиқлансин.”**

### **III. Рақобатга таъсирнинг таҳлили**

#### **7. Ҳужжатни қабул қилинишининг оқибатлари прогнози**

**7.1.** Ўзбекистон Республикаси Вазирлар Маҳкамасининг “Чорвачилик тармоғига давлат томонидан субсидия ажратишни тартибга солувчи норматив-ҳуқуқий ҳужжатларни тасдиқлаш тўғрисида” 2020 йил 15 майдаги 280-сон қарорига ўзгартиришлар ва қўшимчалар киритиш тўғрисида”ги қарор лойиҳасининг иловасида мазкур қарорнинг амалдаги 1-бандининг саккизинчи хатбошиси қуйидаги таҳрирда баён этилмоқда:

**“Паррандасаноат” уюшмасига аъзо бўлган паррандачилик хўжаликлари томонидан 2020 йилда паррандаларнинг ота-она галасини шакллантириш учун импорт қилинадиган бир кунлик наслдор жўжалар бош сони прогноз кўрсаткичлари 8-иловага мувофиқ тасдиқлансин.”**

Ўз навбатида, **“Паррандасаноат” уюшмасига аъзо бўлган паррандачилик хўжаликларига яратиб берилаётган қулайликлар ва преференциялар** уларнинг мазкур уюшмага аъзо бўлмаган паррандачилик билан шуғулланувчи хўжаликларига нисбатан афзал ҳолатга эга бўлишига ҳамда бундай қулайликлар ва преференцияларга эга бўлиш учун ушбу уюшмага мажбурий тартибда аъзо бўлиш ҳолатига олиб келади.

Бундан ташқари, Ўзбекистон Республикасининг **“Рақобат тўғрисида”ги Қонунининг 12-моддасига** асосан давлат бошқаруви органлари ва маҳаллий давлат ҳокимияти органларининг айрим хўжалик юритувчи субъектларга уларни товар ёки молия бозорида фаолият кўрсатаётган бошқа хўжалик юритувчи субъектларга нисбатан афзал ҳолатга кўядиган имтиёзлар, преференциялар ва енгилликларни асосиз равишда бериши, айрим хўжалик юритувчи субъектларнинг

фаолияти учун бошқа камситувчи ёки имтиёзли шартлар (шароитлар) **белгилаши тақиқланган.**

Шунга кўра, бир кунлик наслдор жўжаларни импорт қиладиган **барча паррандачилик хўжаликларга** тенг шарт-шароит ҳамда соғлом рақобат муҳитини яратиш мақсадида мазкур хатбошисидан “Паррандасаноат” уюшмасига аъзо бўлган” сўзлари чиқариб ташлаш лозим.

Таъкидлаш керакки, Ўзбекистон Республикаси Президентининг “Рақобат муҳитини янада ривожлантириш ва иқтисодиётдаги давлат иштирокини қисқартириш бўйича қўшимча чора-тадбирлар тўғрисида”ги 2020 йил 6 июлдаги ПФ-6019-сон Фармонига асосан Монополияга қарши курашиш кўмитаси имтиёзлар, преференциялар ва фаолиятни амалга ошириш учун эксклюзив ҳуқуқлар шаклида кўрсатилаётган давлат кўмагининг самарадорлиги устидан давлат назоратини амалга ошириш ҳамда улар рақобат муҳитига салбий таъсир этган тақдирда, уларни бекор қилиш бўйича Ўзбекистон Республикаси Президентига мунтазам равишда таклифлар белгиланган.

#### IV. ХУЛОСА

Юқоридагилардан келиб чиқиб, барча паррандачилик ва балиқчилик хўжаликларига тенг шарт-шароитлар, имкониятлар ва рақобат муҳитини яратиш мақсадида мазкур қарор лойиҳасида Ўзбекистон Республикаси Вазирлар Маҳкамасининг “Чорвачилик тармоғига давлат томонидан субсидия ажратишни тартибга солувчи норматив-ҳуқуқий ҳужжатларни тасдиқлаш тўғрисида”ги 2020 йил 15 майдаги 280-сон қароридан ва у билан тасдиқланган Низомларидан ҳамда Низомларнинг иловаларидан **“Паррандасаноат” уюшмасига аъзо бўлган**” ҳамда **“Ўзбалиқсаноат” уюшмасига аъзо бўлган**” сўзларни чиқариб ташлаш юзасидан тегишли ўзгартиришлар киритилишини назарда тутувчи бандлар киритгандан сўнг қайта ишланган қарор лойиҳаси қабул қилиниши **мақсадга мувофиқ ҳисобланади.**

Шунингдек, Ўзбекистон Республикаси “Рақобат тўғрисида”ги Қонуни талабларига риоя қилган ҳолда паррандачилик ва балиқчилик хўжаликларига тенг рақобат муҳитини яратиш мақсадида Ўзбекистон Республикаси Президентининг «Чорвачилик тармоғини давлат томонидан кўллаб-қувватлашнинг қўшимча чора-тадбирлари тўғрисида» 2020 йил 29 январдаги ПҚ-4576-сон қарорига тегишли ўзгартириш киритиш масаласини кўриб чиқилиши мақсадга мувофиқ ҳисобланади.